



Na osnovu člana 17. stav 1. i člana 44. stav 1. Zakona o Visokom sudskom i tužilačkom vijeću Bosne i Hercegovine („Službeni glasnik Bosne i Hercegovine“, br. 25/04, 93/05, 48/07, 15/08, 63/23 i 9/24), a u vezi sa članom 61. i 62. Poslovnika Visokog sudskog i tužilačkog vijeća Bosne i Hercegovine („Službeni glasnik Bosne i Hercegovine“, br. 55/13, 96/13, 46/14, 61/14, 78/14, 27/15, 46/15, 93/16, 48/17, 88/17, 41/18, 64/18, 12/21, 26/21, 35/21, 68/21, 1/22, 26/23, 83/23 i 9/24), Visoko sudsko i tužilačko vijeće Bosne i Hercegovine (u daljem tekstu: Vijeće), u sastavu sudija Halil Lagumdžija, predsjednik Vijeća, sudija Aleksandra Obradović i sudija Sanela Gorušanović - Butigan, potpredsjednice Vijeća, tužilac Sanin Bogunić, mr. Lejla Hadžić, tužilac Saša Sarajlić, tužilac Željka Fabić, advokatica mr. Duška Bogojević, sudija Ljiljana Bošnjak - Glizijan, advokat dr. sc Davor Martinović, sudija mr. Srđan Forca, sudija Mustafa Šabić, advokatica Amila Kunosić i tužilac Snježana Petković, na sjednici održanoj 17., 18. i 19.04.2024. godine, donijelo je

R J E Š E N J E

o imenovanju zamjenika glavnog tužioca Tužilaštva Bosne i Hercegovine

- I. Za zamjenika glavnog tužioca Tužilaštva Bosne i Hercegovine imenuje se **Mladen Furtula**.
- II. Datum stupanja na dužnost imenovanog Vijeće će odrediti posebnom odlukom.

O b r a z l o ž e n j e

Na osnovu člana 36. Zakonom o Visokom sudskom i tužilačkom vijeću Bosne i Hercegovine (u daljem tekstu: Zakon o VSTV-u BiH) i člana 33. i 34. Poslovnika VSTV BiH, Visoko sudsko i tužilačko vijeće Bosne i Hercegovine je na internet stranici Vijeća objavilo javni konkurs dana 15.01.2024. godine pod brojem: 04-07-3-188-1/2024, kojim su oglašene 2 (dvije) pozicije zamjenika glavnog tužioca Tužilaštva Bosne i Hercegovine.

Prijavni obrazac sa pratećom dokumentacijom putem Modula za online apliciranje podnijelo je ukupno 17 (sedamnaest) kandidata.

Od navedenog broja pet kandidata je odustalo od dalje konkursne procedure dok jedan kandidat nije položio kvalifikacioni test koji je proveden u skladu sa odredbama člana 47. Poslovnika VSTV BiH.

Nakon obavljenih razgovora sa kandidatima u skladu sa odredbama člana 57. i 58. Poslovnika kreirana je rang lista kandidata na kojoj se nalazi ukupno 11 kandidata od kojih jedan kandidat nije ostvario minimalan uspjeh od 110 bodova iz člana 59a), stav 1. tačka c), a koji je potreban da bi kandidat uopšte mogao biti predložen za imenovanje.

Rang lista kandidata je objavljena na zaštićenom dijelu internet stranice i dostupna je kandidatima koji učestvuju u konkursnoj proceduri.

Nadležno podvijeće za predlaganje kandidata za imenovanje na nivou Bosne i Hercegovine iz člana 37. Zakona o VSTV BiH je dana 09.04.2024. godine održalo sastanak na kojem je u skladu sa članom 59b. Poslovnika VSTV-a BiH izvršilo finalno rangiranje kandidata, te Vijeću dostavilo rang listu kandidata sa obrazloženim prijedlogom za imenovanje.

Za drugu poziciju zamjenika glavnog tužioca u Tužilaštvu Bosne i Hercegovine nadležno podvijeće je na osnovu člana 59b) stav 4 i stav 5. tačka a), b) i c) Poslovnika VSTV BiH a u vezi sa kriterijima iz člana 43. Zakona o VSTV BiH predložilo četverorangiranog kandidata Mladena Furtulu.

Razmatrajući zaključenu rang listu kandidata i utvrđeni broj bodova, kao rezultat ocjenjivanja svih kriterija propisanih Zakonom o VSTV-u BiH i Poslovnikom VSTV-a BiH, Vijeće je odlučilo da za drugu poziciju zamjenika glavnog tužioca Tužilaštva Bosne i Hercegovine imenuje Mladena Furtulu, na rang listi pod rednim brojem 4 i dolazi iz reda srpskog naroda.

Kada je u pitanju broj ostvarenih bodova, Vijeće je imalo u vidu da je imenovani kandidat u toku konkursne procedure, u pogledu bodova za kriterij stručnosti i sposobnosti pravne analize ostvario ukupno 100 bodova od mogućih 100 bodova, dok je na razgovoru pred nadležnom komisijom Vijeća u pogledu drugih kriterija ostvario ukupno 25,4 od mogućih 30 bodova na razgovoru, što ga je u konačnici rangiralo na četvrto mjesto rang liste kandidata sa ukupno ostvarenih 125,4 boda od mogućih 130 bodova.

Kriteriji stručnosti i sposobnosti pravne analize imenovanog kandidata koji obavlja dužnost tužioca, utvrđeni su na osnovu ocjene rada za posljednje tri godine za koje je ocijenjen, i to za 2019. godinu ocjena 5, 2021. godinu ocjena 5. i 2022. godinu ocjena 5., a računajući do dana isteka roka za podnošenje prijava po navedenom konkursu. Dakle, kandidat je za navedene tri godine za koje je ocijenjen ostvario prosjek od 5,0. Prema odredbama člana 56. stav 2. Poslovnika VSTV-a BiH, njegovoj prosječnoj ocjeni rada za prethodne tri godine dodijeljen je ekvivalentan broj od 100 bodova koji se koristi u konkursnoj proceduri. Ovdje je potrebno dodati da odlukom Vijeća nosioci pravosudne funkcije nisu bili ocijenjeni za 2020. godinu kao posljedica pandemije koronavirusa.

Ostali kriteriji, koji se odnose na sposobnost kandidata da odgovorno, nezavisno i nepristrasno obavlja funkciju za koju se prijavio, profesionalne nepristrasnosti i ugleda, te ponašanja van posla, dosadašnjeg radnog iskustva kandidata, edukacije i usavršavanja, objavljivanja stručnih i naučnih radova, te drugih aktivnosti u struci i komunikativnosti utvrđeni su na razgovoru pred nadležnom komisijom Vijeća, kojom prilikom je svaki član komisije nezavisno bodovao kriterije, kako je to propisano u čl. 54a., 54d., 54e. i 54f. Poslovnika VSTV-a BiH, pri čemu je kandidat po tom osnovu u konačnici ostvario ukupno 25,4 bodova.

Imenovani kandidat je svoje radno iskustvo sticao u okviru tužilačkog sistema. Od 2019. godine obavlja dužnost tužioca Tužilaštva BiH u okviru Posebnog Odjela za organizovani, privredni kriminal i korupciju. Od 2014. godine do 2019. godine obavljao je dužnost tužioca u Kantonalnom tužilaštvu Kantona Sarajevo. Prethodno je od 2008-2014. godine sticao iskustvo u Tužilaštvu BiH na različitim poslovima. Kandidat ima ukupno oko 14 godina radnog iskustva nakon položenog pravosudnog ispita.

Pored ranga na Rang listi, ostvarenog broja bodova, okolnostima koje su relevantne za procjenu podobnosti kandidata iz člana 48a. ovog poslovnika, Vijeće je vodilo računa i o potrebi osiguranja adekvatne nacionalne i spolne zastupljenosti u tužilaštvu, te je prilikom donošenja rješenja o imenovanju primjenilo odredbe člana 43. stav (2) Zakona odnosno člana 59b) tačka c) Poslovnika VSTV BiH.

Naime, iz Rang liste kandidata jasno proizilazi da su kandidati pod rednim brojem 2. i 3. ostvarili bolji uspjeh od imenovanog kandidata za 2,4 odnosno 1,4 bod, odnosno da navedeni kandidati imaju i određeno duže radno iskustvo u odnosu na imenovanog kandidata. Međutim, oba kandidata dolaze iz reda bošnjačkog naroda i njihovo imenovanje ne bi bilo u skladu sa navedenom odredbom člana 43. stav 2. Zakona.

Tužilaštvo Bosne i Hercegovine u svojoj rukovodnoj strukturi ima glavnog tužioca i četiri zamjenika glavnog tužioca. Trenutno su upražnjene dvije pozicije zamjenika glavnog tužioca dok aktuelni zamjenik Ismet Šuškić, dana 30.09.2024. godine ispunjava uslove za starosnu penziju.

Iako Zakon o Tužilaštvu Bosne i Hercegovine ne sadrži eksplicitnu normu kojom se propisuje nacionalni sastav rukovodne strukture tužilaštva, Vijeće je, imajući u vidu značaj ovog tužilaštva, njegove nadležnosti, te činjenici da tužilaštvo postupa na cijeloj teritoriji BiH, u svojoj dosadašnjoj praksi vodilo računa o nacionalnom izjašnjenju kandidata na pozicije glavnog tužioca i zamjenika glavnog tužioca. Navedeno je i u duhu odredaba člana IX. 3. Ustava Bosne i Hercegovine.

Dakle, pored stručnosti kandidata i ostvarenog uspjeha u konkursnoj proceduri Vijeće je prilikom odabira i imenovanja kandidata imalo u vidu činjenicu da glavni tužilac dolazi iz reda srpskog naroda dok preostala tri zamjenika glavnog tužioca, nakon imenovanja Džermine Pašića na poziciju zamjenika, dva su iz reda bošnjačkog a jedan zamjenik iz reda hrvatskog naroda.

U pogledu dijela rješenja o stupanju na dužnost imenovanog, isto se odgađa do okončanja dodatne provjere iz člana 86c. Zakona, ukoliko se ista provodi, odnosno do okončanja upravnog spora ukoliko je pokrenut protiv rješenja o imenovanju.

Ovo rješenje će biti objavljeno na internet stranici Vijeća, shodno članu 44. stav (1) Zakona i članu 62. stav (4) Poslovnika VSTV-a BiH, uz naznaku datuma objave od kojeg počinje teći rok za podnošenje tužbe.

Imajući u vidu sve iznesene razloge, Vijeće je na osnovu člana 43. Zakona o VSTV BiH i čl. 59b. stav (5) tač. a), b), c) i d), čl. 61a) i 62. Poslovnika VSTV-a BiH odlučilo kao u izreci ovog rješenja.

Pouka o pravnom lijeku: Protiv ovog rješenja može se pokrenuti upravni spor pred Sudom Bosne i Hercegovine u roku od osam dana od dana objavljivanja rješenja o imenovanju na internet stranici Vijeća.

Broj: 04-07-3-1775-1/2024
Datum: 18.04.2024. godine



